

KOCHUAM TE THAGAU LAM AH PUI DING DAN.

Rev. Awnkhankhup.

- I. **THUMAPUI** : Mihing te kipawlkhawmna mun zosia ah, phachuam taka khawsak khawm thei na dingin, kipuihuaina pha a mamaw hi. Mihing khat-leh-khat kipuihuai tua pawimaw I hi dan uh, I Lalpa'u Jesu'n le ala gen hi (Mat. 9:36). Enkawltu leh Chingtu ding neilo Belam te chu, A bit ngai puau in, pung le apung ngai puau hi. A ziak chu, Enkawltu leh Puitupha a umlou ziak ahi. Zia gualma chun, Kochuam mipi hile Puitu pha leh panpitu ding bei in, I hina ding gual tak ua le umthei lote I hi zo tau hi.

Kipuihuaina iti chu – Mi ama hina dungzui ah napha semdawk thei dinga ziltinla leh, zia guala chu umthei dinga thununzaw na ahi. A semthei ding midang te mangcha ah, na pawimaw taka sepdaw theina le ahi. Mi minthang John R.Moth chun “Puitu hina diktak chu, a chiana ding lampi hechian ah, zia lampi chu mipite chiapi theina hi ahi” ala ti. USA President, Truman chun “Puitu hina chu, mipi ten a sepnawp lou uh thilte thanuam taka sepdaw sak theina chu ahi” ala ti kit hi.

II. **TULAI AH I KIPUIHUAI DAN TEU :**

i). **Nawthaw** : Puitu khenkhat in ami puiteu, a nungram ua pat anawthaw un, sep ding a um phat leh sem un-bawl un ati thaw'u ah. Ahinla, min thilpha abawl te ahepha ngai puau hi. A sep phat teu chu le, ahi ding mawng in a ngai un, kipakpi na chang ahe puau. Zia guala mi phatna leh napha sepdaw te gen ngailo in, a phatlo nau leh a sepkhial teu chu ahun-leh-hunlo ti gel sese lou ah gen gen ziang sek te chu puitu pha leh muan um ahi ngai puau hi. British te hunlai ah, a Colony teu ah zia gual kipuihuaina chu ala mang sek ui. Tiangpum tawh a nasem teu anaw in anaw vel ziang sek ui.

I hiatlo kal un, ei uh hun ahinle, zia gual ah midang te sep ding leh bawl ding bep hia ah, min a sep phat uh umsun te le kipakpi theilo Puitu tamtak ki um ding in ginchak a um hi.

ii). **Kaizut thaw** : Puitu khenkhat te chun, a mipui teu chu a masang lam ua pat in amau thuneina mang in, a kaizutthaw sek un, “Eizui un, Ei zui un, atiu ah” anawplo sasau in aki zuisak sek ui. A nasep umzia leh a poimaw dan hiatsaklo in thagum in mipi a kizui sak ua, mipiten le bangma agen ngamlo ziak un, thase pumpum in a zui ham ham sek ui.

Zia gual Puitu te chun, mipite taksan na achang ngai puau in, kuama athuzaw zo taktak puau hi. Mipiten a nungram ua pat in a nuisan ua, zia chu Pawlpi a dingin khanmaw baw a suak sek hi. Thatnawpna taktak a um thei pua, kithutuakna a tasam in, Pawlpi ahatsak thei ngai puai.

Zia gual mimal thuneina manga kipuihuaina hi, German Dictator Adolf Hitler mipui dan ahi. Kochuam sunga le zia gual ah hiatthiam sakna leh thatnawpna um lo ah, ut-leh-da thu umlo ah kipuihuaina hi a umthei hi.

iii). Kitawnpi : Masang lai ah China te Puitu minthang, WUCHI chun, a sepai te nek-gual Ann ane, a puansil gual uh asil ah, a lupnau in a lum ah, Puitu dang gual in Sakol a le chuanglo in, a sepai te tawh Keng in lam a zot khawm sek ui. A sun ann ding uh kipuak in, gim-leh-chawl a thuak khawm ua, zia chu a lawting na thuguk ahi. Mother Teresa (1910-1997) ‘Missionary of Charity’ te houtu nu kha, a puitu chanpi sister dangte tawh kibang in a kivan ah, Kolkotta ah, amun pi’u, ‘MOTHER HOUSE’ ah kikhawpna anei phat ua leh, leitual in a kichu khawm ua, ama chu a naupang pen gual in a umsek hi atiu. Puitu pha chu a mite tawh a kitawnkhawm zing in, a mite khualna’n a dim ah, a mite phatna ding ahi phawt leh sepnawplo bang ma anei ngai puai.

III. **KOCHUAM HINA :** Kochuam hi Pathian Kochuam a chapa (Khrista) thisan a chawk, a Suangphum le Tangthiangtho ahi thu te a lekhabu thiangtho ah I mu ahi (Sam 87:1,2 ; Nas. 20:28). A neitu diktak Jesu khrista ahi, mimal leh pawlkhat kineisak chuam leh ki inteksak chuam tite a umlo ding ahi. Mun khenkhat ah Puitu khenkhat ten Kochuam sunga pan alak tam tak u leh ki inteksak/kithunei sak ki sa’n, Kochuam hi amau a hisak kha thei zel sek ui.

IV. **KOCHUAM ETKAWLNA MUNTE :** Thagau lam ah Kochuam etkawlna mun pawimaw deute, zia gual hin, enkhawm hitiu.

1. BIAK INN PROGRAMME TE :-

A). Kochuam te thagau lam ah etkawl na lawting leh gasua a um theina ding un Biakna vaiguan(Programme) te kitup taka guanggal masak ah, pauchapna toh delzui zel ding ahi.

B). Hun hi matdik guat tinten ah, vaiguan um sate ahun leh amun toh kituak ah matthiam ding ahi. Zia chu thagau lam malzawlna I chan na ding kalbi masapen khat chu ahi.

C). Biak inn mun ah Biakna leh chawihoina lasak te thagau lam ah tuitak ah sakdaw guat tup ding ahi. Kingak khawmna ding, thugentu kouna ding, pelfa ding te a La sak maimai lo ding ahi. (Zia umzia chu, Pathian chawihoina’n lasa hitiu ti sek ding tina ahi).

D). Mimal pauchapna leh pauchap khawmna te Pathian ngaitua na lungthim diktak toh thagau ah pauchap na nei ding ahi.

E). Pathian thutak kivakna gual ah Pulpit Sermon ah mimal dutuina(ngaidan) leh lunglutna kigen khum na ding hilou in, Pathian kianga pauchap na tamtak tawh kisingsa ah, thagau lam thute ma gendaw tup ding ahi.

F). Kikhawpna puitu hi henla, thupuangtu/gennawp neite hitaleh paukam kilawmtak leh thagau lam thilte ngaitua zing kawm ah thu pawimaw te chu kihitsak/puangzak zel ding ahi.

2. INN VENA : Pathian Kochuam te a chenna mun ngei ua va kanthak chu, amau ngaisak ah, amau tawh kizawpna hoitak I nei suklatna ahi.

VE DINGA POIMAW DIAKTE :

A). Puitu : Mawpuakna chuam chuam neite tawh kivetua ah, I kochuam dinmun leh na I sep dingte genkhawm mun ah, I dinmun uh kihetthiamtua a poimaw hi.

B). Pemit thak te : A umnau leh a hi nau hetdaw ah, ami hina gual tak ua etkawl thiam ah, a septhei lam chiat ua mawpuakna piak a pha'i.

C). Lawting/Lawsamte : Kochuam mi a tamdan dungzui ah lungawi dan thiam dinga tawsot ah pauchap piak zel ding ahi.

D). Damlo te : Taksa damlo te chu Innmun hi henla, Hospital hitaleh, kandaw ah pauchapna tawh ve zel ding ahi.

E). Lusuunte : Ka-leh-Lusuun hun ah Kochuam tea pat kinepna liantak um ahi ti hemil lou in, delthei chan ah del ah, chutpi thei chan chan chutpi ah pauchap piak ding ahi.

F). Biak-Inn kai zolou : Thagau ah basam mite ve ah, pauchap na tawh tilkhona hi a phachuam ma mai.

G). Vaitung/Vaikuante : Zilna nei, Sepna nei leh Khualzin mite a tun-leh-kuan hun ua ve ah, pauchap piakzel a pawimaw hi.

V. THAGAU LAM AH KOCHUAM PUITU TE HINA DING TE :

1). Mi piangthak : Thagau lam ah mi piangthak a pianthakna miten a hetpi thei uh ahi ding ahi. Piangthak nailo mite kianga pianthakna thu hil ding leh mi piangthak te enkawl tu ding ahi ziakin, mi piangthak diktak ahi tei tei ding ahi.

2). Pathian nasepna lunglut ah kipemi : Sawlchak Paul in, Peter kianga pathian Belam te enkawl ah thada taka semlou ah, thanuam taka enkawl dingin a zilti hi(IPet. 5:2). Zia gual ma chun, Kolosa 3:23-24 na ah mihing na sem guala kingailo a, lunglut taka sem ding tilkhona I mu'u ahi. Hiatna, Thiamna leh Talent hoi taktak nei ngala, kipiakzawna neilo te chu a kimang thei diak puau hi.

3). Kingaitawm mi : Khawvel kivaipuakna dan ah, Lalna leh thuneina kichuna ahiziakin, mi kingai niamte/zangai thei ten a gual lelzel un. Pathian nasep na'n vang aki ngaitawm pou ua leh chawisang in a ki um hi (Phil. 2:5-11). Nungzui Johan thiltup chu, Khrist chu pung deu deu intin, kei chu kiam deu deu ding ka hi (Johan 3:30). Mosia chu leichung mihing te laka thu nuaigol pen leh nunnem pen ahi (Num. 12:3). Sawlchak Paul Testimony I sim leh Sawlchak te laka neupen (IKor.15:9), mi thiangtho zosia te sanga le neuzaw(Eph. 3:8). Mi gitlo te laka le gitlo penpen(ITim. 1:15) gual ah aki gen na thu I mu ahi. Midang dang te thu nuai ah umtheilo chu mi chungale le thu anei zo thei diak puau.

4). Mi kithunun zo mi : Mani kithunun zoten midang le a thunun thei ua, a nasep na'n le a lawting thei sek ui (Prov. 16:32). Eima kithunun zolo te chu khawpi chimsa kulbang neilo gual ahi (Prov. 25:28). Sualna leh thil diklo te haisan in, thildik leh apha te bawl dinga a kithunun zou ding ahi. Committee na leh kikhawp na dang dang

te ah, ahun taka tungthei dinga kithunun zo mi ahi ding ahi. Kampau kisum thei mite chu thagau mitak ahiu.

5). Thutakna leh titakna : Pathian mimat minthang Billy Graham lawtinna thuguk pali(4), zia gual hin a kigen sek hi.

- a). Sum-leh-Pai ah diktatna
- b). Hindan thiangtho,
- c). Kochuam tawh sepkhawmna,
- d). Avum-aval ah kigen phalo.

6). Pauchap mi : Kochuam puitu, thagau a mi lawting hitheina dingin pauchap mi ahi ding ahi. Belam te a pui na ding lampi diktak a hettheina dingin Belampu lian Jesu Khrist tawh kipawl ah, ama mel hawl a a pauchap zing ding ahi (Jer. 10:21).

7). Thagau a dim mi : Pathian thagau pawlna panglo in kuama'n na asem thei puan, a lawting thei puai ti hetthiam a, Pathian thagau thiangtho lunggul ah nei ding ahi (Eph. 5:18). "Lei Belampu ten la apui thei puai....." ti hia ah, thagau thiangtho don ah pauchap zing ding ahi.

8). Midang seppi thiam : Phillipi 2:4, I mu gual in, eima dawina cho enlo ah, midangte a ding le ngaitua a nei ding ahi. Mipil pen le kuama, ama change nasem thei leh lawting thei a um puai. Midang tawh sepkhawm I ti phal leh, midang te siamdaw ding tina le ahi zel hi. Zia gual a midang te tawh sepkhawmna leh kipumkhatna lou in thagau lam kipuihuaina a um thei puai.

VI. THUTAWPNA : Thagau a Lalgam nasem dingin Lalpa'n ei chial a, mite natna sudam a Kochuam mite enkawl dingin eitel ahi. Midang te hukdamna dingin I khut teu zaktou hitiu in, mun haksa leh gentheina mun ale taise mai lo in, lalpa a gingin pan lathak hitiu. Lalpa gam keklet ahi theina dingin a pawimaw dan zel ah, mittui cho hilou, thisan seng ngam dingin kisai tiu.